

Pa: Mayornan cu tin yiu(nan) cu ta atendiendo un scol cu ta resorta bou di SKOA.

Fecha : 6 Maart 2015

Nos number : 2015-00097

Topico : aclaracion riba topico di pago escolar y subsidionan paga door di Gobierno.

Apreciabel mayor,

Pa medio di e carta aki Stichting Katholiek Onderwijs Aruba (SKOA) kier a duna mayornan y maestronan informacion riba e topico di schoolgeld y subsidionan paga door di Gobierno, pero tambe elabora un biaha mas riba locual cu no a wordo paga na SKOA ainda.

Recientemente SKOA a bin compronde cu den un of mas medio di comunicacion a sali e noticia na unda ta informa comunidad cu Gobierno a dicidi di paga suma di subsidionan atrasa. E informacion cu ta circula ta crea e impresion erroneo cu e pago di 500.000 florin a trece un solucion duradero pa cu e situacion financiero precario di SKOA.

E pago di e suma di 500.000 florin ta encera parti di e diferencia di subsidio cu SKOA no a ricibi na 2014 door cu gobierno a retene un suma extra na 2014 compara cu por ehempel aña 2013. E suma aki lo ser uza pa pagonan atrasa den 2014 y no tin mucho influencia ariba aña 2015 en adelante. Pues SKOA kier informa cu e pago aki ta un pago riba e subsidio atrasa riba solamente un aña y no ta encera e diferente añanan.

Normalmente como fundacion encarga cu maneho di scolnan bo ta wordo subsidia pa un 90% door di gobierno. Cu e 90% aki e fundacion ta percura di paga e gastonan y adelanta ('schiet voor') 10% y na momento cu e fundacion haci entrega di su relato di cuenta financiero anual e 10% restante mester wordo cubri door di gobierno.

Na aña 2014 SKOA a haya su mes confronta cu un situacion aun mas dificil, pues e mester a percura di cubri 20% di e gastonan. SKOA ta sumamente preocupa cu e fondonan cu e tin disponibel teniendo na cuenta cu e subsidio di e prome kwartaal di 2015 tambe tabata basa riba 80%, locual atrobe ta nifica un porcentahe di 10% menos cu normal. Esey teniendo na cuenta cu ni cu SKOA ricibi e 100% esaki ta suficiente pa cubri e gastonan involvi cu enseñansa.

Manera SKOA ya a informa den pasado, un posibel re-evaluacion di suma di pago escolar por tuma luga solamente si gobierno pone suficiente sumanan disponibel pa por cubri e gastonan di enseñansa. Esaki ta algo cu semper SKOA a trece dilanti y sigur den su encuentronan cu e minister desde comienso di Februari 2015. Pues tur cos ta depende di e contribucion di gobierno.

E situacion di SKOA y un posibel solucion no ta depende solamente di e pago atrasa di e 500.000 florin. E ta depende tambe di:

1. e pagonan atrasa di e 10% restante di subsidio basa riba e cuentanan anual cu a wordo entrega caba na gobierno (1998-2010).
2. un ahustacion di e suma cu SKOA ta ricibi di subsidio pa 2015 bay dilanti.
3. e pago completo pa su trahadonan di limpieza (werksters). Anualmente SKOA tin cu aporta rond di 400.000 florin pa por cubri e gasto real di su trahadonan di limpieza (werksters) cu den SKOA su punto di bista mester wordo subsidia completo.

Apesar cu Gobierno a priminti di lo cumpli cu e tres puntonan ariba menciona SKOA no a ricibi un fecha concreto ki ora e puntonan aki por wordo atendi cu ne. Tanten cu no ricibi e sumanan aki concreto di Gobierno SKOA por lo pronto no lo por haci ningun cambio cu por tin consecuencia serio pa financiamento di enseñansa.

Te na e momentonan aki no tin suficiente claridad, si of riba cual fecha gobierno por atende cu e puntonan aki, locual cu ta depende tambe di e presupuesto 2015, e dia cu e ta wordo trata y con di berdad e presupuesto ta wordo aproba door di parlamento. Riba e puntonan di discusion y decision den parlamento SKOA no tin ningun autoridad den dje.

Pa termina SKOA kier a informa cu debi na e echo cu nos no a ricibi suficiente aporte di un forma structural, no ta keda SKOA na e momentonan aki ningun otro salida di mantene e aumento ya stipula di pago escolar di 250 florin (20,84 florin pa luna). E proceso di inscripcion y re-inscripcion ya ta andando caminda tin mayornan ya a laga sa cu nan kier paga e suma completo pa nan yiu.

Como un instancia educativo bo kier haci tur esfuerso pa brinda enseñansa di calidad na e alumnonan, pero pa bo por cumpli cu esaki bo mester por dispone riba e fondonan necesario pa cu esaki. Si no ta ricibi suficiente fondo for di gobierno, SKOA mester acudi na mayornan pa por cubri e gastonan di enseñansa di nan yiunan. Sino na final esunnan cu lo wordo perhudica ta e muchanan mes.

SKOA, ta spera cu pa medio di e carta aki informa bo persona corectamente y debidamente.

Na number di directiva di Stichting Katholiek Onderwijs (SKOA)



Stevan Caines  
Director suplente